

FASNACHT 2026 NULL BOGG UF DE SUPERBLOGG

Im Santihans laufft jetzt e Tescht
e weeneli wie amme am Kinderfescht
Klapprigi Holz-Konschtrukzioone
findsch grad e baar in däre Zone
Wyl, das isch nämlig, glaubsch es kuum
e ganz e neie Läbensruum
D Idee fir dä Mega-Evânt
kunnt us em Breesi-Departemânt
zem Parggblätz kenne reduziere
muesch e komplett neis Konzäpt kreiere
Drby isch s Superblogg-Projäggt jo gschoole
in Barcelona hänn si s kenne hoole
dr Naame vom Transfer-Resultat isch mager
wie wärs mit Umerziehigslager?
Dr Conradin sait zur Esther Keller
gäll, z China ging woorschyynlig schneller
Drby, das gilt jo generell
im Baudep do goot gar nyt schnell
D Bauschtellezaal stygt Joor für Joor
s git Lüt die frooge, jo s isch woor;
worum die Situazion esoo isch
und ob dr Wessels wiider do isch?
Aber s Baudep stoot nit zur Debatte
zrugg zem Superblogg mit de Latte –
s isch doch nur e Froog vo dr Zyt
bis es bald e richtige Bloggart git
dä luegt denn gnau uffs Regelblatt
uusegäh vom Kanton Basel-Stadt
dr Bloggbewooner wird do informiert
wie är sy Läbensruum optimiert
stoot ebbis nit im Regelblatt, ischs glunge
dänn bruuchsch nur e baar Bewilligunge
und bisch bi allne siebe Ämter gsy
isch dr Superblogg-Tescht scho lang verby.
Dr Davidsrain, es schloot uffs Gmiet
isch numme no Bloggrandgebiet
und au an der Metzerstross
isch, usser Verkehr; nit vyyl mee los
statt vome Defender oder sunsch emene Kaare
wirdsch vom Laschtevelo iiberfaare
aber halt, me sott s Negativi nit iiberdryybe

in de Spiilregle wird au Guets beschryybe
Ohne Bewilligung derfsch zem Bischpil spiile
Pingpong, Fäderball, Jasse und Boule
und d Regierig isch do gar nit fuul
Dr Conradin und d Esther kemme uff e Partie verby
zue d Lagerinsasse sitze sie an Tisch
wyl, s git jo noohär no en Apéro riche.
Aber jetzt emool eerlig und das isch nit extrem
was mir do kritisiere isch doch kai Broblem
d Wält stoot uffem Kopf
s hätt Grieg und Gryyse ooni Änd
und mir sitze in unsere – no sichere – Wänd
und joomere iiber zwenig Parggblätz und Pflanze im Topf
e Ukrainer froogt sich: sinn die no richtig im Kopf?
Bi de Wält-Bolittiker muesch nit frooge
richtig im Kopf wäri bi de maischte glooge
Dr Donald, dr Vladimir und dr Xi Jinping
liege alli ganz bsunders ring
woby me bim Donald sofort dänggt
dä isch doch nit emol beschränggt
d Karin Keller hett er ämel nit verschtande
mit Queens-English kasch bi ihm nit lande
aber mit Sanggaller-Dialäggt, mir schigge uns dry,
wäre d Stroofzöll no vvyll heecher gsy
Aber jetzt noonemol zem Superblogg
und vyllicht zem näggschte Summerhogg
in säggs Monet isch de Tescht jo glaufe
kasch billigs Latteholz go kaufe
S Sperrguet isch abholt, mir dringge e Bier
und hänn wieder unser Santihans-Gwartier
E Arbeitsgruppe duet evaluiere ob me s Projäggt soll wyterfiere...
wie wenn das ebber wurdi interessiere.
Mir wänn uns jetzt nimm Gedangge mache
wänn lieber an d Fasnacht go gniesse und lache!
Ab uf d Gass und vvyll Spass.

* * * * *